

Primère cartè nabèquë'è San Pedro

Quëquë'è Pedro lu ra shmënë Jesús

1 Na Pedro, nahia poshtë shtë Jesucristo. Quëquë'a'a cartè rè' lu grë ra shmënë Dios naquërelde fuërë ládzi', ra narrë'tsë zihani partë shtë guédchiliu, ra naquërelde ra regiuni shtë Ponto, nu Galacia, nu Capadocia, nu Asia, nu Bitinia. ²Quëquë'a'a lu të nagulë Dadë Dios nu bënë më disponer dizdë guahietë gac të shmënë më; por ni Espíritu Santo gulë lë'è të parë guëzu'bë diaguë të shti'dzë Jesucristo. Gudili më lë'è të parë guëzunë më almë shtë të por rënë shtë'në Jesús. Gulë bënë recibir zihani bendición shtë Dios nu gulë cuédchí ldu'u të.

**Dzuléza'a iurë guëabrí
Jesús de gube'e**

³Rdë'na'a alabar Dios naná Dios nu Dadë shtë Jesucristo lamë shtë hia'a purquë gulë nacúbia'a purquë nalé bëga'a ldu'u më lë'è hia'a. Iurne' nadápa'a esperansë nadë rialúdi'i por medio de Jesús purquë guashtë më ladi ra tégulë. ⁴Nu nadápa'a tubi herenci nagutsa'u më lu gube'e; adë rialúdi'in nu adë rëac mánc'hédi'in. Chulë nahin.

⁵Rialdí ldu'u të shti'dzë Dios; por ni quëhapë më lë'è të. Por pudërë shtë Dios gac salvar të; por ni dzulezë të tiempë naguédchini Jesús stubi.

⁶Na të segurë ra cusë ni; por ni nalé rquitë ldu'u të aunquë por du'pë tiempë rzac zi të lu zihani clasë prëbë ⁷të parë guëlúa'a na verdá fe shtë të. Fe shtë të más lasáquin quë orë naná rdëdë lu gui'i parë gac bë'a mënë nahin legítimë orë. Orë rialúhin perë fe shtë të rialúdi'in. Si talé tsagla'guë tsaldí ldu'u të shti'dzë Dios mientras napë të prëbë, tsasé mënë de quë rialdí ldu'u të de verdá. Iurë guëlúa'a pudërë shtë Jesucristo, gunë më honrar lë'è të; guëne'e më lugar lu gube'e parë lë'è të. Guëni'i më cusë za'quë de lë'è të. Guédchini më nu grë mënë guená rall lu më.

⁸Lë'è të rac shtu'u të Jesucristo aunquë rnádi'i të lu më. Rialdí ldu'u të shti'dzë më iurne' sin adë chu rnádi'i lu më, nu rquitë ldu'u të. Nalé lëgrë na ldu'u të iurë runë të llgabë gapë të cusë chulë lu gube'e, hashtë runë faltë di'dzë parë gac bë'a mieti lla na lëgrë nanapë të. ⁹Nalé lëgrë nanú la'ni ldu'u të purquë gunë të recibir lo quë naguëne'e Dios. Zni gac purquë

rialdí ldu'u të shti'dzë Jesucristo narni'i gac të salvar.

¹⁰Ra profetë naguquërelde guahietë biadi'dzë rai' antsë lla gac salvar ra mënë. Biadi'dzë rai' shcuendë favurë nagunë Dios parë lë'ë hia'a. Gudili rai' nu guna'bë di'dzë rai' shcuendë lla gac salvára'a. ¹¹Guc shtu'u rai' niac bë'a rai' pë tiempë u chu na el quë nagunë salvar ra mënë. Lë'ë Espíritu Santo bé'ni' compa'ni lë'ë rai' parë guëquë'ë rai' lla gunë Cristo sufrir. Nu bëquë'ë rai' shcuendë lla gunë mënë alabar lë'ë më. ¹²Espíritu Santo bëluá'ai' ra profetë de quë adë quëhúnëdi'i rai' sirvë mizme lë'ë rai' sino quëhunë rai' sirvë lë'ë hia'a iurë bëquë'ë rai' di'dzë rë'. Bëquë'ë rai' shcuendë diza'quë, perë adë guc bé'adi'i rai' pë runë cuntienë ra di'dzë. Perë iurne' lë'ë Espíritu Santo bëlua'a mizme cusë ni lu hia'a por medio el quë nabëlua'a diza'quë lu të con pudërë shtë Espíritu, el quë nabëshe'ldë Dios parë cuezënhí'i lë'ë hia'a. Ra ianglë rac shtu'u rai' tsasë rai' pë runë cuntienë di'dzë ni perë rúnëdi'i rai' gan gac bë'a rai'.

**Rac shtu'u Dios guëquërélda'a
tubi vidë za'quë**

¹³Por ni, gulë bë'në preparar bien parë gac bë'a të lo quë narac shtu'u më. Gulë bëzu'bë diaguë shti'dzë më. Gulë gapë esperansë de quë gac të salvar iurë gunë më cumplir lo quë naguzublú më la'ni vidë shtënë të. Gac të salvar iurë guëabrí Jesucristo stubi. ¹⁴Cumë shini obedientë, adë rianáldëdi'i të tëchi deseo mal ziquë bë'në të

antsë, tiempë adë bënguë bé'adi'i të lë'ë më. ¹⁵Gulë gubani tubi manërë za'quë sin duldë igual ziquë el quë nagulë lë'ë të; na më santu; zni rac shtu'u Dios guëquërelde të sin duldë. ¹⁶Sagradas Escrituras rni'i: "Gulë gac të mënë santu purquë nahia santu".

¹⁷Si talë rni'i të Dios na Shtadë të, napë quë guëzu'bë diaguë shti'dzi' guëdubi tiempë mientras quërelde të lu guédchiliu. Na më juësi nu gunë më juzguë sin adë gúnëdi'i më favurë parë ni tubi mënë. ¹⁸Puës gudilli më parë gac të librë, parë adë tsanáldëdi'i të tëchi ra custombrë nadë rlluí'idi'i, custombrë nabë'në të recibir de shtadë guélú të. Gudilli Jesucristo por duldë shtë të, lédëdi'i con bédchichi u orë narialú ¹⁹sino gudilli më con rënë shtë më. Na më ziquë tubi lli'li mitu'në nanápëdi'i ni tubi faltë, nilë manchë. Rënë shtë më lasaquin. ²⁰Bë'në Dios destinar Jesucristo dizdë antsë cueshtë guédchiliu të gac më Salvador. Antsë tsalú guédchiliu bëlua'alú më lu mënë; bédchini më parë gac salvar të. ²¹Por lë'ë Jesucristo lë'ë të rialdí ldu'u të Dios, el quë nabildishtë lë'ë Jesús ladi ra tégulë nu bëcuezë më lé'i' ladë ldi shtë më catë nanú llni nu pudërë. Lugar shtë hunurë guzubë më. Rialdí ldu'u të shti'dzë Dios, por ni quëbezë të dzë naguëquërelde të con lë'ë më.

²²Lë'ë të bëzu'bë diaguë të diza'quë, por ni bëzunë më ldu'u të parë gac shtu'u të de verdá ra shmënë Jesús. Iurne' gulë guc shtu'u ra shmënë Jesús con

guëdubinú ldu'u të. ²³Hia lë'ë të gulë të nacubi; napë të vidë sin fin, lëdëdi'i por ra cusë narialú sino por shti'dzë Dios, di'dzë nanapë pudërë parë guëne'e vidë eternë, nu nunquë adë rialúdi'in. ²⁴Sagradas Escrituras rni'i:

Grë ra mënë na rall ziquë gui'lli.
Chulë rlua'a guë'ë shtë plantë,
perë rbidchi gui'lli nu ra
guë'ë rlaquë lu guiu'u.
Por du'pë tiempë quërelde mënë
lu guë'dchiliu; zni na vidë
shtë mënë,

²⁵perë shti'dzë Dios nunquë adë
rialúdi'in; napin pudërë parë
siemprë.

Mizmë di'dzë ni bini të iurë
biadi'dzë na'a lu të.

2 Por ni gulë bësa'në grëtë'
clasë cusë mal ziquë llanë,
nu bishi, nu enga'ni. Adë sébidi'i
ldu'u të pë shtë sa'l. Adë rní'idi'i të
di'dzë dzabë cuntrë sa'l. ²Mejurë
ziquë tubi me'dë naguër ralë, rac
shtú'ull gádchill, zni gulë guc
shtu'u shti'dzë Dios; nahin ziquë
lechë parë ra me'dë. Shti'dzë mē
nápëdi'in bishi; nahin parë tsaru'bë
vidë cubi nanapë të por Espíritu
Santo. Por shti'dzë mē gapë të
salvaciu'ni ³purquë nané të, rdë'ë
të cuendë favurë nabë'nē mē parë
lë'ë të.

Cristo ziquë tubi guë'ë nanabani

⁴Gulë guabi'guë lu Dadë Jesús; na
mē cumë ziquë tubi guë'ë nanabani.
Ra ngui'u bëquë guia'a rall lë'ë mē
cumë cusë adë rlu'f'idi'i, perë Jesús
náhi' ziquë tubi guë'ë nagulé Dios.
Nalé lasaquin. ⁵Dios quëhuntsá'uhi'
tubi grupë mēnē nanabani por

Espíritu Santo; na të ziquë guë'ë
shtë iádu'u. Gulë gac të bëshuzi
santu të parë gunë të ofrecërë lu
Dios oraciuni nu labansë narëuu'
ldu'u mē. Gunë mē recibir ra
ofrendë ni por Jesucristo ⁶purquë
naescritë la'ni Sagradas Escrituras:

Gulë guná, na rdchi'ba ziquë
tubi guë'ë lu guë'dchi Sión;
Guë'ë ni na guë'ë principal shtë
tubi hiu'u ru'bë, tubi guë'ë
nagudili Dios. Napin llëru'bë
valurë.

El quë natsaldí ldu'i shti'dzë mē,
rtúdi'i lull; gunë mē honrar
lë'ë mēnē ni.

⁷Parë lë'ë të naná rialdí ldu'i
shti'dzë mē, napë mē llëru'bë
valurë, perë parë ra nadë rialdídi'i
ldu'i shti'dzë mē, gac cumplir lo quë
narni'i Sagradas Escrituras de lë'ë
rall:

Lë'ë guë'ë nabëquë guia'a ra
narza'a hiu'u, guquin guë'ë
principal shtë hiu'u.

⁸Nu rni'i Sagradas Escrituras:

Guërelde mēnē guëc guë'ë ni;
por guë'ë ni ldaguë mēnē catë
nídi'i fin.

Pues lë'ë rall rrelde rall por adë
gúnëdi'i rall cuendë diza'quë shtë
mē. Puës parë ni nadestinadë rall.

Na të tubi grupë shtë bëshuzi

⁹Lë'ë të na të mēnē nagulé Dios
entrë grë mēnē; na të tubi grupë
shtë bëshuzi parë gunë të sirvë lu
Rëy. Na të tubi guë'dchi nabë'nē
ldai' Dios. Na të mēre shmēnē Dios
të parë guadi'dzë të grë cusë ru'bë
nabë'nē Dios. Gulé mē lë'ë të. Gulú
mē lë'ë të lu nacahi parë tsutë të lu
llni parë guënë të lë'ë mē. ¹⁰Lë'ë të

antsë adë nápëdi'i tē vidē shtë Dios
perē iurne' sí, na tē shmēnē Dios.
Antsë ni tubi adē chu bēgá'adi'i
ldu'u lē'ē tē perē iurne' Dios bēga'a
ldú'i' lē'ē tē.

Gulē guquērelde parē Dios

¹¹Lē'ē tē amigu narac shtua'a,
na tē mēnē ziquē mēnē zitu parē
guédchiliu rē'; na tē mē zitu entrē
los de más mēnē. Runa ruēguē lu
tē, adē gúnēdi'i tē cumplir ra deseo
mal nananú la'ni ldu'u tē purquē
na rahin ziquē enemigu narshini
ldu'u tē. ¹²Gulē gapē buen conductē
entrē ra naná guēnēdi'i Dios tē parē
guēdē'ē rall cuendē na tē shmēnē
Dios. Aunquē iurne' rni'i rall cuntrē
lē'ē tē cumē si fuērē na tē narguini
mēnē, perē guēná rall cusē za'quē
naquēhunē tē nu guēdē'ē rall
cuendē, nu guēni'i rall dushquilli
Dios, purquē iurní guēabrí ldu'u
rall con Dios, nu guēdē'ē Dios vidē
eternē parē lē'ē rall.

¹³Gulē bēzu'bē diaguē ordē
shtë gobiernē nu grē ra narnibē'a
purquē na tē shmēnē Jesús. Gulē
bēzu'bē diaguē di'dzē shtë rēy,
el quē narnibē'a más; ¹⁴nu gulē
bēzu'bē diaguē shti'dzē gobiernē
nabēshe'ldē rēy ni. Bēshe'ldē rēy
rumanē lē'ē rall parē gunē rall
honrar el quē naquēhunē bien nu
gunē rall cashtigu el quē narunē
mal. ¹⁵Puēs Dios rac shtú'ui' de quē
lē'ē tē gunē tē bien tē parē guēta'u
tē rua' mēnē nanēdi'i gac bē'a mudē
narac shtu'u Dios guēquērelde rall.
Rni'i rall cusē tuntē cuntrē lē'ē tē.

¹⁶Gulē cue cumē ziquē nguui
naná librē, perē adē rúnēdi'i tē
usar libertá narne'e Dios ziquē tubi

prētēstē parē gúnēl duldē. Más bien
gulē cue cumē ziquē tubi muzē shtë
Dios. ¹⁷Gulē bēdē'ē rēspēti parē
grē mēnē. Gulē guc shtu'u grē ra
shmēnē Jesús. Gulē bē'nē rēspēti
Dios nu gulē bē'nē rēspēti lē'ē
narnibē'a más lu guédchiliu.

Guzac zi Jesús

¹⁸Grē tē nanapē lamē, gulē gapē
rēspēti lu shlámēl nu gulē bēzu'bē
diaguē shti'dzē ral'; lēdē niá'asēdi'i
lu lamē za'quē u lu ra narga'a ldu'i
sáhi', sino tambiēn gulē bēzu'bē
diaguē shti'dzē ra lamē mal
narunē nalaa'dchi. ¹⁹Rēuu' ldu'u
Dios con nguui naná pacēnci iurē
rzunalde mēnē lē'ēll sin causē.

²⁰Perē si talē quēhúnēl mal, por
ni quēlda'a mēnē hiaguē guēquēl
nu nal cunformē con cashtigu ni,
perē ípē cusē za'quē quēhúnēl? En
cambi, si quēhúnēl bien nu rzac
zi mēnē lē'ēl, si talē rua'a ldú'ul
lu cusē ni nu nápēl pacēnci, ni sí
rēuu' ldu'u Dios. ²¹Puēs guna'bē
Dios lē'ē tē parē tsagla'guē tē rēglē
ni. Jesucristo guzac zíhi' por lē'ē
tē. Sufrimientē shtëhi' na ziquē
muestrē tē gunē tē ziquē bē'nē mē.
²²Lē'ē mē ni adē bē'nēdi'i' duldē
nu nilē jamás adē guluguéd'i' mē.
²³Iurē lē'ē ra mēnē gurushtiá rall
guēc mē, adē bēquēbidi'i' mē con
galrushtiá. Iurē bēzac zi mēnē lē'ēl,
adē bēdchigrē dí'dzēdi'i' lu mēnē
sino guna'bē mē lu Dios parē gunē
Dios juzguē lē'ē rall za'quē za'quē.
²⁴Mizmē Jesucristo bia'a mē grē
ra duldē shtë hia'a iurē bē'nē mē
sufrir lu cruz tē parē gáca'a ziquē
tubi naguti; hia adē chu gúnēdi'i
duldē parē guēbánia'a tubi vidē

za'quë delantë lu më. Lë'ë më guc më ridë të parë lë'ë të guëac të maldá narunë të. ²⁵Antsë lë'ë të guzú të ziquë lli'li naguniti, perë iurne' bëabrí ldu'u të con Jesucristo. Lë'ë më canihapë më lë'ë të ziquë vëquërë nu na më el quë nacanihapë ldu'u të, të parë adë guëñtídi'i të jamás.

Cunseju parë ra nabëtsë'a

3 Ziquë ra muzë napë quë gunë rall cumplir, también lë'ë të tse'lë ra nguii, gulë bëzu'bë diaguë shti'dzë tsé'lél, purquë si talë adë rialdídi'i ldu'u tsé'lél diza'quë, iurë guëñall conductë shténél, tsaldí ldú'ull shti'dzë më sin ni tubi di'dzë naruadí'dzél lúhi'. ²Zni gaquin purquë guená rall quërelde të bien; guená rall napë të rëspëti lu Dios nu guená rall napë të vidë limpi. ³Adornë shtënë të gáquëdi'in cusë fuërë ziquë narzë'lë ra begu u ziquë ra shnezë cu'u, ziquë orë u lari za'quë. ⁴Sino adornë shtënë të gaquin la'ni ldu'u të catë adë chu rnádi'i luhin, adornë nadë rialúdi'i. Gac të mënë nadu'u nu naza'quë con pacënci con grë mënë. Zni rëuu' ldu'u Dios guëquërelde të. ⁵Tiempë guahietë ra na'a santu nagualdí ldu'i shti'dzë Dios, na rai' mënë nadu'u nu bë'në rai' rëspëti tse'lë rai'. Chulë guc vidë shtë rai'. ⁶Por ejemplë, Sara bëzu'bë diágui' shti'dzë Abraham nu guni'i Sara lu tsé'li': "Dadë shtëna". Iurne' na të ziquë shini Sara si talë quërelde të bien, si talë adë rdzébëdi'i të lu narunë cuntrë lél'él.

⁷Nu zac lë'ë të tse'lë na'a, gulë gac mënë za'quë; gulë bë'në honrar

tsé'lél. Gulë bë'në rëspëti lu tsé'lél purquë ra na'a nápëdi'i rall fuersë ziquë ra nguii, perë napë rall vidë eternë juntë con lë'ë të por tubi favurë nabë'në Dios parë grë të. Gulë bë'në cumplir di'dzë rë' parë guëdë'lë Dios grë cusë narna'bë të lu më. Súdi'i ni tubi cusë ziquë storbë parë oraciuni shtë të.

Quëhúnél bien perë rzac zi mënë lél'él

⁸Por fin, gulë gac unidë con tubsë llgabë. Gulë bëga'a ldú'ul sa'l. Gulë gac shtu'u sa'l naná shmënë Dios. Gulë gac nadu'u nu gulë bë'në tratë sa'l con rëspëti. ⁹Adë quíllidi'i të sa'l con mal aunquë rúnél cuntrë lél'él. Adë gushtiádi'il guëc sa'l aunquë rni'i guídzél cuntrë lél'él. Al contrari, gulë guna'bë lu Dios por contrari shténél të gunë ldai' më sa'l. Gulé më lë'ë të parë gunë të cumplir ra cusë rë'. Zni gunë të recibir bendición shtë më ¹⁰purquë naescritë:

El quë narac shtu'u guëbáñill bien nu rac shtú'ull guëquitë ldú'ull, napë quë gápëll cuidadë lo quë narní'ill, adë guësiguëdi'ill sa'll con di'dzë.

¹¹Runë tucarë guësá'nél cusë mal nu gúnél bien; napë quë quíllil nezë catë rbedchí ldú'ull, nu tsaglá'guëll shnezë më.

¹²Lë'ë Dadë canihapë më ra më za'quë nu rquë diaguë më oraciuni shtë rai' iurë rna'bë nguii ni lu më.

Perë lë'ë më runë më cuntrë ra narunë mal.

¹³¿Chu napë pudërë parë gúnëll
dañi lë'ë të si talë quëhunë të bien?

¹⁴Perë si talë rzac zi të purquë
rianaldë të tëchi cusë za'quë,
dichusë na të. Adë rdzëbëdi'il lu
mënë nu adë riádi'i ldu'u të ¹⁵sino
gulë bëzu'bë diaguë di'dzë shtë
Cristo guëdubi tiempë. Na më lamë
shtë të. Nu gulë gac preparadë
cualquier iurë parë guëquebi të
lu ra mënë pëzielú nal shmënë
Jesús. Si talë guëna'bë di'dzë
rall lul, hia nanëll lla gúnëll parë
defender lë'ël. Nadë más napë quë
guëni'inul lë'ë rall con galnadu'u
nu rëspëti. ¹⁶Gulë guquërdë bien
sin ni tubi duldë të parë iurë ra
contrari quëgni'i didzabë cuntrë
lë'ë të, guëtú lu rall purquë nádi'in
verdá. ¹⁷Si talë guëdë'ë më sí sac zi
të, mejurë gunë të sufrir por cusë
za'quë, lédëdi'i por mal.

¹⁸Gulë bë'në llgabë; Cristo guti
tubsë vultë por ra pecadurë;
jamás gátidi'i më stubi. Tubldí na
shcuendë më lu Dios perë guti
më shlugar ra nanapë duldë parë
gue'denú më lë'ë hia'a lu Dios.
Guti më en cuantë cuerpë shtëhi',
perë guashtëhi' ladi ra tégulë por
pudërë shtë Espíritu. ¹⁹Tiempë
ni guadi'dzë më lu ra espíritu
shtë tégulë lugar catë napë Dios
lë'ë rai' ziquë prësi. ²⁰Mënë ni
naguquërdë tiempë shtë Noé, adë
bëzu'bë diaguëdi'i rall shti'dzë Dios.
Pues adë bëshé'ldëdi'i Dios juici
lueguë sino con pacënci quëbezë
më hashtë guctsa'u barcu ru'bë. Por
barcu ni bëldasë mënë, u sea shunë
mënë, guc salvar lu juici shtë nisë.
²¹Manërë ni iurë bëriubë nisë të,
guni'i të lu sa' të de quë nasalvar

të. Galëriubë nisë nádi'i ziquë bañi
parë cuerpë shtë të sino nahin sēñi
de quë nanëll bëzuné Dios ldú'ul,
de quë limpi na ldú'ul purquë
Jesucristo guashtëhi' ladi ra tégulë.
²²Iurne' cuezë Jesucristo gube'e
ladë ldi shtë Dios. Cagnibë'a më.
Grë ra ianglë nu autoridá nu grë ra
narnibë'a stubi lugar, rzu'bë diaguë
rai' shti'dzë më.

Gulë bë'në sirvë Dios según llni nabëne'e më

4 Por ni, ziquë Jesucristo béni'
sufrir shcuerpë më, gulë
gac dispuestë gunë të sufrir. El
quë naguzac zi shcuérpi', adë
rianáldëdi'ill tëchi duldë. ²Rac
shtë'ull guëbáni'll según voluntá
shtë Dios mientras quëréldëll lu
gué'dchiliu. Hia nédi'ill gúnëll
cumplir deseo mal nananú
la'ni ldú'ull. ³Tiempë nagudëdë,
guquërdë të vidë mal; bë'në
të lo quë narquitë ldu'u ra mënë
nanadë guënédi'i Dios. Gubani të
lu vici; bë'në të cumplir deseo mal:
guzuu'dchi të; gudáu sha'të të lu
mellë nu bii' të zili vini. Guanaldë
të tëchi dioses falsë nanapë mënë,
mënë naquërdë sin lëy za'quë
nu sin rëglë. ⁴Perë iurne' lë'ë rall
rdzëguë' ldu'u rall de quë lë'ë të
adë rúnëdi'i të compa'ni lë'ë rall lu
ra cusë mal ziquë antsë. Nu rni'i
rall di'dzë dzabë cuntrë lë'ë të.
⁵Perë segurë napë quë guëtë'dë rall
cuendë lu Dios; gunë më juzguë grë
mënë. Gunë më juzguë ra nanabani
nu también grë ra tégulë. ⁶Lë'ë ra
tégulë hia bini rai' diza'quë. Guc rai'
juzguë ziquë mënë; guti rai'. Bini
rai' diza'quë të parë si talë tsaldí

ldu'u rai' shti'dzë më, guëbani rai' ziquë Dios. Espíritu Santo guëne'e vidë eternë parë lë'ë rai'.

⁷Hia ze'dë bi'guë nasesë fin shtë grë cusë. Por ni gulë bë'në llgabë tubldí të gúnëdi'il duldë. Adë riádi'i ldú'ul sino gulë guna'bë lu Dios.

⁸Subrë todë gulë gapë llëru'bë amor parë sa'l purquë si talë rac shtú'ul sa'l, iurní quëhúnël perdunë lé'ëll zihani vuelte. ⁹Gulë bë'në recibir lídchil chu stubi ra bëchi sa'l naze'dë lídchil sin quë adë riasháquëdi'i ldú'ul. ¹⁰Cualquier don nabëzëlaa'dchi Espíritu Santo parë lé'ëll, gulë bë'në sirvë lu ra sa' të con llni ni ziquë mëne naquëhunë cumplir lo quë narac shtu'u Dios. Gulë bëzëlaa'dchi lo quë nabë'nël recibir parë bien shtë sa'l. Gulë bë'në usar llni shtë Espíritu Santo nabëne'e Dios të parë tsaru'bë sa'l. Iurní gac të muzë za'quë shtë Dios. ¹¹Si talë chu rac ruadi'dzë ziquë mësë, napë quë guadí'dzëll shti'dzë më por pudërë shtë më. El quë narunë sirvë sa'll, napë quë gúnëll sirvë por pudërë narne'e më. Zni gunë mëne alabar Dios por medio lë'ë Dadë Jesucristo. Cha guëdë'ë hia'a labansë lu më. llëru'bë na pudërë shtë më. Guë nibë'a më parë siempër. Amén.

Ra shmënë Jesús rzac zi rall

¹²Lë'ë të narac shtua'a, adë rdzëguë'di'i ldu'u të iurë ra prëbë ze'dë. Na prëbë ziquë be'lë narru'u lu gui'i, perë adë rdzëguë'di'i ldu'u të. Adë rúnëdi'il llgabë sulë lé'ëll rúnël sufrir lu prëbë. ¹³Mejurë gulë bëquitë ldu'u të purquë quëhunë të sufrir mizme manërë cumë bë'në

Cristo sufrir. Gulë gua'a ldu'u të parë gapë të lëgrë la'ni ldú'ul, nu gulë bëquitë ldu'u të iurë guëdchini më stubi con pudërë nu llni. ¹⁴Si talë rushtiá mëne lu të purquë na të shmënë Jesucristo, dichusë na të. Espíritu shtë Dios cuezënuhi' lë'ë të. ¹⁵Mënë runë sufrir purquë rguini rall sa' rall u rbaa'në rall, u runë rall mal u riutë rall asuntë nadë rllu'i'di'i, u na rall nadishi'bi; perë adë rúnëdi'i të ra cusë ni parë adë guëdchínidi'i cashtigu guëc të nu gúnël sufrir. ¹⁶Mejurë na si rzac zil purquë rianáldël enseñansë shtë Jesús; adë rtúdi'i lul iurní sino gulë bédë'ë graci lu Dios purquë nal shmënë më.

¹⁷Hia bëga'a iurë sublu' juici shtë Dios con mizme shmënë më. Si talë juici ni guëzublú con lë'ë hia'a ðlla gac fin shtë ra naná rzu'bë diáguëdi'i diza'quë shtë më? ¹⁸Ra nguui narunë cumplir shti'dzë më, runë rall llëru'bë fuersë parë gac salvar rall; ðpë gac con ra nanápëdi'i rëspëti parë cusë santu nu rianaldë rall tēchi cusë mal? ¹⁹Por ni, el quë narzac zi purquë nahin voluntá shtë Dios, napë quë tsagla'guë gúnëll bien nu tsagla'guë tsaldí ldú'ull gac salvárell por pudërë shtë el quë nabëntsa'u nguui. Siempër gunë më cumplir shti'dzi'.

Cunseju parë ra narialdí ldu'i Jesús

5 Quëdë'ëhia cunseju parë ra më guani'si naná cabësë shtë shmënë Jesús. Tambiën na nahia më guani'si nu nahia testigu de quë Cristo bë'ni' sufrir. Guna recibir juntë con lë'ë të iurë guëlua'a pudërë nu llni shtë më. ²Gulë

gupë ra shmënë Jesús ziquë tubi vëquërë; quëhápëll ra lli'li purquë zni rac shtu'u Dios. Gulë bënënin voluntariamente, lédëdi'i purquë cagnibë'ahia lë'ë të. Bënë compaňi lë'ë rai' con guëdubinú ldu'ul, lédëdi'i purquë rbezë të gunë të recibir dumí. ³Gulë gupë ra shmënë Dios tubi manërë nadu'u, lédëdi'i ziquë lamë narunë nalaa'dchi lu ra muzë. Gulë gac ejemplë za'quë lu rai'. ⁴Iurë Jesús, el quë nanapë pudërë parë quëhapë ra lli'li, guëlua'alúhi' lu hia'a stubi, lë'ë të gunë të recibir tubi premi, tubi corunë narabtsë'ë nanadë rialúdi'i.

⁵Nu zac lë'ë të nanapë menos edá, gulë bëzu'bë diaguë di'dzë shtë ra më guani'si. Grë të, gulë gac më nadu'u lu sa'l purquë naescritë:

Dios rzu më lu grë ra narunë naru'bë.

Runë më compaňi grëtë' ra naná nadu'u.

⁶Gulë gac mënë nadu'u delantë lu Dios pudërusë. Gulë bédë'ë sí të guëñibë'a më lë'ë të; iurní gunë më honrar lë'ë të iurë rga'a tiempë.

⁷Gulë bédë'ë grë galriá ldu'u guëca'a më purquë nalë rac shtu'u më lë'ël; quëhapë më lë'ël.

⁸Gulë cue nasini nu gulë gapë cuidadë. Enemigu shtë të na mëdzabë Satanás; canzëll ziquë tubi león narzubá. Rguílill mënë parë ldaguë rall lu pudërë shtë'nëll të tsaldí ldu'u rall shti'dzë mëdzabë.

⁹Gulë sutipë lu mëdzabë; gulë gac

firmë lu shnezë Dios. Gulë bédë'ë cuendë de quë grëtë' sa' të naná shmënë Jesús guëdubi partë shtë guë'dchiliu, quëgzac zi rai' mizmə manërë quë lë'ë të. ¹⁰Despuësë de quëgzac zi të por du'pë tiempë, Dios el quë narne'e zihani favurë nu bendición, el quë naguna'bë lë'ë të parë gapë të vidë sin fin juntë con Cristo, gunë më të gac të firmë lu shnézi', nu gunë më parë cuedchí ldu'u të, nu guëne'e më fuersë parë lë'ë të. Mizmə Dios ni guna'bë më lë'ë hia'a parë tsutë hia'a lu llini catë quërelde më. Bënë mëhin purquë unidë na hia'a con Cristo. ¹¹Cha guëdë'na'a alabar lë'ë më. Amén.

Rialú cartë rë' con tubi saludë

¹²Silvano tubi bécha'a, quëquë'ëll cartë rë' por na. Lluá'ahia Silvano quëhúnëll cumplir voluntá shtë Dios. Cartë rë' nadu'pin perë la'nin bënëhia cunseju. Quëhuna testificar grë ra favurë nu bendición nabë'në të recibir de Dios, rlua'a de quë nezë za'quë naguna'zi të nahin verdá.

¹³Ra grupë shtë shmënë Jesús naquërelde Babilonia, ra nagulé Dios ziquë gulë më lë'ë të, quëgshe'ldë rai' saludë. Nu zac Marcos, shinia, quëgshë'ldëll saludë parë lë'ë të. ¹⁴Gulë bënë saludar ra sa' të con tubi saludë shtë amor.

Gulë cuedchí ldu'u të, lë'ë të naná unidë con Jesucristo. Amén.